



**Sumáriu Kazu
Tribunál Distritál Suai
Marsu 2022**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza :17

Artigu	Tipu Kazu	Númeru
Artigu 145 Kódigu Penál (KP), no artigu 2, 3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no artigu 36 kona-ba krime sira violénsia doméstika nian hanesan krime publiku)	3
Artigu 177 KP no artigu 2, 3, 35 Lei Kontra Violénsia Doméstika (LKVD)	Abuzu seksuál ba menór ho natureza violénsia doméstika	1
Artigu 1757, 1758, 1759, 1762, 1765, 1786, 1782, 1804, 1805 KS	Ezersísiu podér paternál	1
Artigu 138 KP no Artigu 145	Omisídiu simples no ofensa ba integridade fizika simples	1
Artigu 20 (1), Lei Arma Brankas	Arma brankas	2
Artigu 252 KP	Furtu agravadu	1
Artigu 154 KP	Maus-tratus ba kónjuje	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Artigu 171 KP	Koasaun seksuál	1
Artigu 172 KP no artigu 23, 24	Tentativa violasaun seksuál	1
Artigu 178 KP	Aktu seksuál ho adolexente	1
Artigu 172 KP no artigu 253 KP	Violasaun seksuál no roubu	1
Artigu 316 KP	Kontrabandu	2
Artigu 178 KP no artigu 145 no artigu 2, 3, 35 LKVD	Aktu seksuál ho adolexente no ofensa ba integridade física simples ho natureza violénsia doméstika	1
Totál		17

2. Totál desizaun ne'ebé JSMP monitoriza:12

Tipu pena	Artigu	Númeru
Suspensaun ba prizaun nia ezekusaun	Artigu 68 KP	4
Pena multa	Artigu 67 KP	3
Omologa	Artigu 216 KPP	1
Pena prizaun	Artigu 66 KP	1
Suspensaun ba prizaun nia ezekusaun no absolve	Artigu 68 KP	1
Pena prizaun no suspensaun ba prizaun nia ezekusaun	Artigu 66 KP no artigu 68 KP	1
Absolve		1
Totál		12

3. Total kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun : 5

1. Krime abuzu seksuál ba menór ho natureza violénsia doméstika

Nú. Prosesu : 0025/14.CVSUI

Kompozisaun Tribunál : Koletivu

Juis : Dr. Samuel da Costa Pacheco, Dr. Benjamin Barros
no Dra. Patricia de Araujo Fatima Barreto Magno Xavier

Prokuradór : Dr. Rafael Jeronimo Gusmão

Defeza : Dr. Domingos dos Santos

Desizaun : Pena prizaun tinan 12

Iha 01 Marsu 2022, Tribunál Distritál Suai prezide julgamentu leitura akordaun ba krime abuzu seksuál ba menór ho natureza violénsia doméstika ne'ebé envolve arguidu FX hasoru nu'udar nia oan entiada, iha Munisípiu Covalima.

Akuzasaun prokuradór

Prokuradór akuza katak iha 10 Marsu 2014, iha oras tuku 00:00 kalan, lezada toba dukur iha ninia kuartu laran, arguidu tama ba lezada nia kuartu hodi kolu lezada nia roupa, hafoin arguidu kaer lezada nia orgaun sensitivu hodi halo relasaun seksuál ho lezada, lezada hakfodak loke matan haree arguidu iha hela lezada nia leten, lezada tanis no atu hakilar maibé arguidu hatete ba lezada katak "*o hakilar o mate*", tauk ho arguidu ninia ameasa ne'e lezada nonook de'it, nune'e arguidu kontinua halo relasaun seksuál ho lezada to'o ejakula.

Tuir mai iha oras no fulan ne'ebé la apura, maibé nafatin iha tinan 2014, iha kalan boot, arguidu kontinua halo relasaun seksuál ho lezada, antes halo relasaun seksuál arguidu ameasa lezada katak "*labele hakilar no labele fó hatene ba ó nia maun sira se lae hau oho mate ó*". Kazu ne'e aneksu ho relatóriu médiku husi PRADET.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15 no konjuga ho artigu 2, 3 (c), 35 (b) no 36 LKVD.

Produsaun ba prova sira

Iha prosesu julgamentu, tribunál labele rona arguidu ninia deklarasaun tanba arguidu edital.

Iha parte seluk, lezada kontinua konfirma faktu hotu iha akuzasaun no deklarasaun katak depoisde akontesimentu lezada ho nia tiu apresenta denuncia iha Polísia VPU, arguidu komesa sai husi uma no halai lakon to'o agora.

Alegasaun finál

Prokuradór haktuir katak, arguidu ninia hahalok provadu no presidente tuir faktu iha akuzasaun mezmua arguidu edital, maibé lezada kontinua konfirma faktu hotu iha akuzasaun no reforsa husi relatóriu médiku iha autus laran. Nune'e prokuradór husu ba tribunál atu kondena arguidu ho pena prizaun tinan 15.

Entretantu, defeza husu ba tribunál atu fó justisa ba arguidu.

Desizaun

Depoisde avalia faktu hotu, tribunál konsidera faktu hotu provadu, mezmu arguidu edital maibé lezada konfirma katak arguidu ho ameasa halo duni relasaun seksuál dala rua ho lezada no prova mós husi relatório médiku.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e. Nune'e tribunál konklui prosesu ne'e no kondena arguidu ho pena prizaun tinan sanolu resin rua.

2. Krime arma brankas

Nú. Prosesu : 0027/18.CVSUI
Kompozisaun Tribunál : Koletivu
Juis : Dr. Samuel da Costa Pacheco, Dr. Benjamin Barros no
Dra. Patricia de Araújo F. B. Magno Xavier
Prokuradór : Dr. Nelson J. S. Magno
Defeza : Dr. Domingos dos Santos
Desizaun : Absolve

Iha 01 Marsu 2022, Tribunál Distritál Suai prezide julgamentu leitura akordaun ba krime arma brankas ne'ebé envolve arguidu Jose Manuel da Silva hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 15 Outubru 2018, comunidade sira hetan arma sira hanesan pistola, (rakitan) rua, bala musan 13, basoka musan ida no granada tolu no entrega ba arguidu hanesan intelejencia J2. Bainhira arguidu simu tiha arma sira ne'e arguidu informa ba iha Bregadeiru Maunana kona-ba arma sira ne'e.

Tuir mai iha 31 Dezembru 2018, Polísia Nasionál Timor-Leste halo buska ba arguidu ninia uma no hetan duni arma sira ne'e iha arguidu nia uma laran, arma sira ne'e arguidu simu husi comunidade sira, maibé arguidu la entrega ba institusaun sira ne'ebé atu rai arma sira ne'e, arguidu hanesan informador iha J2 maibé laos membru PNTL ka FDTL.

Prokuradór akuza arguidu kontra artigu 20 (1), artigu 2 (2 alinea f) Lei Arma Brankas.

Produsaun ba prova sira

Iha prosesu julgamentu, arguidu konfesa totálmente ba faktu iha akuzasaun no deklarata katak momentu simu tiha sasan ne'e husi comunidade sira arguidu rai fali iha ninia uma

no arguidu informa ba Brigadeiru Maunana, maibé Brigadeiru Maunana hatete katak rai iha uma no iha loron 6 Novembru 2018, mai iha Suai villa mak entrega ba iha PNTL sira. Arguidu haktuir tan katak sasan sira ne'e fruzu hotu ona no momentu PNTL sira ba foti arma sira ne'e iha arguidu ninia uma arguidu lahalo inpedimentu hasoru PNTL sira.

Alegasaun finál

Prokuradór haktuir katak, arguidu konfesa faktu hotu iha akuzasaun, prokuradór entende katak arma sira ne'e comunidade entrega ba iha arguidu maibé arguidu lakohi entrega ba iha parte seguransa sira, maibé rai fali iha ninia uma, arguidu la iha kuñesimentu ba arma sira ne'e no bele fó ameasa ba ema seluk nia vida no halo tauk comunidade sira ne'ebé entrega arma ba arguidu, nune'e husu ba tribunál atu kondena arguidu tuir konviksaun tribunál nian.

Entretantu, defeza husu ba tribunál atu absolve arguidu, tanba krime ne'ebé inputa ba arguidu la provadu.

Desizaun

Depoisde avalia faktu hotu, tribunál konsidera arguidu ninia hahalok ne'e la priense krime ne'ebé inputa ba arguidu, tribunál intende katak arguidu kolabora duni ho parte seguransa, maibé parte seguransa husi komandante Brigadeiru Maunana mak ladauk mai iha Suai hodi akompaña arguidu atu entrega sasan sira ne'e ba parte seguransa PNTL Covalima, tanba nune'e tribunál konklui prosesu ne'e no absolve arguidu.

3. Krime arma brankas

Nú. Prosesu	: 0016/20. PDSUA
Kompozisaun Tribunál	: Koletivu
Juis	: Dr. Samuel da Costa Pacheco, Dr. Benjamin Barros no Dra. Patricia de Araújo F. B. Magno Xavier
Prokuradór	: Dr. Nelson J. S. Magno
Defeza	: Dr Albino de Jesus Pereira
Desizaun	: Pena prizaun tinan 3 suspende ba tinan 3

Iha 07 Marsu 2022, Tribunál Distritál Suai prezide julgamentu leitura akordaun ba krime arma brankas ne'ebé envolve arguidu Antonio da Costa Soares hasoru lezadu Abel da Conceição de Araújo, iha Munisípiu Ainaro.

Akuzasaun prokuradór

Prokuradór akuza katak iha 17 Dezembru 2019, iha oras tuku 14:45 lokraik, lezadu ho nia oan sira dada karau ba iha mate uma, bainhira to'o dalan klaran lezadu dada ninia kuda ba fó hemu bé iha mota laran, hafoin ne'e lezadu dada kuda ne'e buka fatin atu kesi, maibé derepente arguidu mosu mai kaer hela dima no foti fatuk tuda hasoru lezadu, maibé lakona, tuir mai arguidu lori dima halai ba sona lezadu nia kabun maibé lezadu satan netik, nune'e dima kona fali lezadu nia liman rezulta kanek no lezadu konsege hadau tiha dima husi arguidu no lori ba uma no kontinua ba apresenta denunsia iha Polísia.

Prokuradór akuza arguidu kontra artigu 20 (1), artigu 2 (2 alinea f) Lei Arma Brankas.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende nia hahalok, foin primeiravés mai hatan iha tribunál no deklara katak ninia hahalok ne'e ladi'ak no promete sei larepete hahalok ne'e hasoru lezadu no ema seluk iha futuru.

Alende ne'e lezadu mós kontinua konfirma faktu sira iha akuzasaun no deklara katak perdua arguidu ninia hahalok no husu arguidu atu labele repete ninia hahalok hirak ne'e iha futuru.

Alegasaun finál

Prokuradór, konsidera arguidu provadu komete krime arma brankas, bazeia ba konfisaun arguidu nian no konfirma mós husi lezada, mezmú arguidu ho lezadu diak malu fali ona maibé atu prevene arguidu repete hikas ninia hahalok ne'e iha, husu ba tribunál atu kondena arguidu ho pena prizaun tinan tolu suspende ba tinan tolu.

Entretantu defeza husu ba tribunál atu aplika pena suspensaun ne'ebé kmaan ba arguidu ho konsiderasaun sira katak arguidu konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu mosu mai kaer hela dima no foti fatuk tuda hasoru lezadu, maibé lakona, tuir mai arguidu lori dima halai ba sona lezadu nia kabun maibé lezadu satan netik, nune'e dima kona fali lezadu nia liman rezulta kanek no lezadu konsege hadau tiha dima husi arguidu no lori ba uma no kontinua ba apresenta denunsia iha Polísia.

Bazeia ba faktu provdu sira ne'e tetu mós sirkuntansia atenuante sira hanesan arguidu konfesa, arrepende nia hahalok, foin primeiravés mai hatan iha tribunál no promete sei la repete tan hahalok hanesan iha futuro. Ho ne'e tribunál konklui prosesu ne'e no kondena arguidu ho pena prizaun tinan tolu suspenden ba tinan tolu.

4. Krime furtu agravadu

Nú. Proses : 0159/18.PDSUA

Kompozisaun Tribunál : Koletivu

Juis : Dra. Patricia de Araújo F. B. Magno Xavier, Dr.
Samuel da Costa Pacheco no Dr. Benjamin Barros

Prokuradór : Dr. Rafael Jeronimo Gusmão

Defeza : Dr. Domingos dos Santos

Desizaun : Pena multa US\$45.00

Iha 07 Marsu 2022, Tribunál Distritál Suai prezide julgamentu leitura sentensa ba krime furtu agravadu ne'ebé envolve arguidu Gilberto dos Santos hasoru lezadu Digno Gegrafo Gepitan, iha Munisípiu Covalima.

Akuzasaun prokuradór

Prokuradór akuza katak iha 06 Dezembru 2018, iha oras tuku 07:00 dadeer, arguidu foti lezadu ninia sasan sira hanesan jelera ho folin US\$250.00 Kado listrik ho folin US\$180.00, supilla listrik ho folin US\$35.00, bor listrik ho folin US\$150.00, carge ho folin US\$75.00, gurinda ho folin US\$50.00, boor listrik kiik ho folin US\$45.00, fiu listrik metru 30 ho folin US\$60.00, vintuña ida ho folin US\$15.00, buli cok ida ho folin US\$10.00, fugaun ida ho folin US\$20.00 no kaisote ai ida ho folin US\$50.00. arguidu ninia hahalok ne'e lezadu hetan prezuiju hamutuk US\$ 940.00

Prokuradór akuza arguidu kontra artigu 252 KP kona-ba furtu agravadu ho moldura penál tinan 2 to'o tinan 8.

Produsaun ba prova sira

Iha prosesu julgamentu, arguidu deklara katak lezadu ninia sasan ne'e iha serbisu fatin, nune'e arguidu ho nia kolega atu muda lezadu ninia sasan ne'e ba fali kos ne'ebé sira hela ba. Antes atu muda sasan sira ne'e arguidu informa ona ba lezadu. Arguidu deklara liután katak sasan sira ne'e arguidu la faan ida maibé momentu ne'eba tia ne'ebé tein ba arguidu ho lezadu sira ne'e mak fó osan US\$50.00 ba kondutor Jonas depois kondutor fó fali osan US\$50.00 ba arguidu, arguidu deklara tan osan US\$50.00

ne'e mai husi ne'ebé mós arguidu lahatene tuir, maibé momentu ne'eba fulan tolu la serbisu ona nune'e arguidu foti osan ne'e no tuir kareta kompania nian mai Dili, nune'e lezadu nia sasan sira ne'ebé antes ne'e rai iha kos arguidu lahatene semak foti.

Alende ne'e, lezadu kontinua konfirma faktu hotu iha akuzasaun no deklarata katak momentu ne'eba serbisu hotu ona, tanba ne'e lezadu fila uluk ba Dili, antes atu ba Dili sasan sira iha serbisu fatin ne'e lezadu ho arguidu sira muda hotu ona ba fatin kos sira hela ba ne'e, bainhira lezadu to'o iha Dili seidak to'o semana rua Sr. Luis telefone lezadu katak arguidu foti sai sasan sira no ba faan hotu ona. Nune'e lezadu husi Dili mai fali Suai atu foti ninia sasan sira maibé bainhira to'o iha Suai sasan sira ne'e la iha hotu ona. lezadu deklarata tan katak uma kos ne'ebé sira hela ba ne'e lezadu mak selu, lezadu haktuir katak arguidu serbisu ho lezadu ne'e selu hotu ona.

Testemuña Madalena da Silva, nu'udar nain, depoimenta katak bainhira lezadu ba Dili la to'o semana rua arguidu foti sai sasan sira ne'e iha uma laran, testemuña haktuir liután katak momentu foti sai sasan sira ne'e la husu tuir arguidu no durante ne'e lezadu mak selu kos.

Alegasaun finál

Prokuradór, haktuir katak mezmú arguidu nega faktu hotu, maibé lezadu no testemuña konfirma katak momentu ne'e arguidu foti sai sasan sira ne'e iha kos no ba faan tiha, tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Entretantu defeza husu ba tribunál atu halo alterasaun husi furtu agravadu ba fali furtu simples no haruka lezadu tama fali sala julgamentu hodi halo tentativa konsiliaun.

Desizaun

Depoisde avalia faktu hotu, tribunál halo alterasaun kualifikasaun husi krime furtu agravadu ba fali furtu simples tanba valor ne'ebé arguidu foti la priense rekezitu husi krime furtu agravadu maibé priense rekezitu husi krime furtu simples no konsidera arguidu provadu foti sai lezadu ninia sasan sira hanesan jelera ho folin US\$250.00 Kado listrik ho folin US\$180.00, supilla listrik ho folin US\$35.00, bor listrik ho folin US\$150.00, carge ho folin US\$75.00, gurinda ho folin US\$50.00, boor listrik kiik ho folin US\$45.00, fiu listrik metru 30 ho folin US\$60.00, vintuña ida ho folin US\$15.00, buli cok ida ho folin US\$10.00, fugaun ida ho folin US\$20.00 no kaisote ai ida ho folin US\$50.00. arguidu ninia hahalok ne'e lezadu hetan prezuiju hamutuk US\$ 940.00

Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$45.00, ne'ebé arguidu sei selu US\$0.50 kada laron durante laron 90.

Tribunál mós fiksa pena alternativa durante loron 40 prizaun, banhira arguidu la selu pena multa refere.

5. Krime kontra bandu

Nú. Prosesu : 0038/21. CVSLL

Kompozisaun Tribunál : Koletivu

Juis : Dr. Samuel da Costa Pacheco, Dr. Benjamin Barros no
Dra. Patricia de Araújo F. B. Magno Xavier

Prokuradór : Dr. Rafael Jeronimo Gusmão

Defeza : Dr Angelmo Pinto

Desizaun : Pena multa US\$30.00

Iha 08 Marsu 2022, Tribunál Distritál Suai prezide julgamentu leitura akordaun ba krime kontra bandu ne'ebé envolve arguida Cristina Moniz no Elisa Cardozo hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 19 Novembru 2021, iha oras tuku 12:00 meiodia, arguida nain rua hatama ikan maran 35 kilo, ilegalmente liuhusi Mota Masin hatama mai Timor-Leste, atu ba faan iha Suai Villa, maibé membru UPF hetan informasaun husi comunidade katak arguida nain rua tula objetu illegal refere iha kareta mikrolet ida naran Garufy, nune'e sasin halo kedan patrolamentu no hapara kareta mikrolet refere no halo pasa revista no deskobre ikan maran 35 kilo ne'e no kontinua lori arguida sira submete ba investigasaun iha Postu Salele.

Prokuradór akuza arguida nain rua kontra artigu 316 KP kona-ba kontra bandu ho moldura penál tinan 2 to'o tinan 6 ka multa.

Produsaun ba prova sira

Iha prosesu julgamentu, arguida Cristina Cardozo konfesa faktu hotu iha akuzasaun no deklarata katak, depoisde akontesimentu lahatama ona sasan liuhusi dalan illegal, arrepende ninia hahalok no promete sei larepete nina hahalok ne'e iha futuru. Entretantu arguida Elisa hili direitu nonook.

Alegasaun finál

Prokuradór konsidera, arguida nain rua provadu komete krime kontra bandu, mezmua arguida Elisa Cardoso hili direitu nonook maibé arguida Cristina Moniz hatete katak ikan maran 35 kilo sira nain rua nian, nune'e husu ba tribunál atu kondena arguida nain rua tuir krime ne'ebé sira komete.

Entretantu defeza husu ba tribunál atu aplika pena suspensaun ne'ebé kmaan ba arguida nain rua ho konsiderasaun sira katak, arguidu Cristina Moniz konfesa, arrepende nia hahalok no depoisde akontesimentu ne'e la komete tan ona krime seluk.

Desizaun

Depoisde avalia faktu hotu, tribunál prova katak arguida nain rua hatama ikan maran 35 kilo, ilegalmente liuhusi Mota Masin hatama mai Timor-Leste, atu ba faan iha Suai Villa.

Bazeia ba faktu provadu sira ne'e no tetu mós sirkunstánsia atenuante sira hanesan arguida Cristina konfesa, arrepende nia hahalok no depoisde akontesimentu ne'e la komete ona krime seluk, ho nune'e tribunál konklui prosesu ne'e no kondena arguida na'in rua ho pena multa US\$ 30.00. ne'ebé arguida nain rua sei selu kada loron US\$ 1.00 durante loron 30. Tribunál mós fiksa pena alternativa durante loron 40 prizaun, bainhira arguida nain rua la selu pena multa refere.

6. Krime kontra bandu

Nú. Prosesu	: 0016/20. PDSUA
Kompozisaun Tribunál	: Koletivu
Juis	: Dr. Samuel da Costa Pacheco, Dr. Benjamin Barros no Dra. Patricia de Araújo F. B. Magno Xavier
Prokuradór	: Dr. Rafael Jeronimo Gusmão
Defeza	: Dr. Albino de Jesus Pereira
Desizaun	: Pena multa US\$30.00

Iha 08 Marsu 2022, Tribunál Distritál Suai prezide julgamentu leitura akordaun ba krime kontra bandu ne'ebé envolve arguida Sandriana Nunes Ribeiro hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 09 Jullu 2021, iha oras ne'ebé la apura, arguida sosa tabaku husi ema Indonezia hodi hatama iligalmente liuhusi aréa Mota Masin, tabaku sira ne'e hamutuk bal 7 no falun 19, arguida sosa ho valor US\$52.50. hafoin sosa tiha tabaku ne'e, arguida tula iha motorizada atu lori ba iha Suai, maibé bainhira to'o iha kruzamentu Koitau, Polísia Unidade Patrulamentu Fronteira (UPF) halo hela patrulamentu no halo autostop hodi pasa revista hodi deskobre objetu refere, tuir mai lori arguida ba submete investigasaun iha Postu Salele.

Prokuradór akuza arguida kontra artigu 316 KP kona-ba kontra bandu ho moldura penál tinan 2 to'o tinan 6 ka multa.

Produsaun ba prova sira

Iha julgamentu, arguida konfesa faktu hotu iha akuzasaun, arrepende nia hahalok, foin primeiravés mai hatan iha tribunál no depoisde polísia kaer arguida to'o agora lahatama ona sasan tuir dalan illegal, arguida haktuir tan katak nesesidade mak obriga hodi viola lei sira.

Tribunál presinde testemuña ninia depoimentu tanba arguida konfesa hotu iha akuzasaun.

Alegasaun finál

Prokuradór, konsidera arguidu provadu komete krime ne'ebé prokuradór akuza ba nia, bazeia ba konfisaun arguida nian, mezmu nune'e atu prevene arguida repete tan ninia hahalok ne'e iha futuru husu ba tribunál atu kondena arguida tuir artigu 316 KP. futuru krime ne'e atu la akontese husu ba tribunál atu kondena arguida ho pena prizaun tuir artigu 316 KP.

Entretantu defeza husu ba tribunál atu kondena arguida ho pena ne'ebé kmaan ho konsiderasaun sira katak, arguida konfesa, arrepende nia hahalok no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguida sosa tabaku husi ema Indonezia hodi hatama iligalmente liuhusi aréa Mota Masin, tabaku sira ne'e hamutuk bal 7 no falun 19, arguida sosa ho valor US\$52.50.

Bazeia ba faktu provadu sira no tetu mós sirkunstánsia atenuante sira hanesan, arguida konfesa, arrepende nia hahalok, primeiravés mai hatan iha tribunál no depoisde akontesimentu lahatama ona sasan ilegamente to'o agora, nune'e tribunál konklui prosesu ne'e no kondena arguida ho pena multa US\$30.00. ne'ebé arguida sei selu US\$1.00 kada lora durante lora 30. Tribunál mós fiksa pena alternativa durante lora 30 prizaun, bainhira arguida la kompri pena multa refere.

7. Krime omisídiu simples no ofensa integridade fizika simples

Nú. Prosesu : 0087/21. BBMLV

Kompozisaun Tribunál : Koletivu

Juis : Dr. Samuel da Costa Pacheco, Dr. Benjamin Barros no
Dra. Patricia de Araújo F. B. Magno Xavier

Prokuradór : Dr. Nelson J.S Magno
Defeza : Dr Manuel Amaral
Desizaun : Pena prizaun tinan 8 ba arguidu AdS no pena prizaun fulan
6 suspende ba tinan ida ba arguidu SFD

Iha 09 Marsu 2022, Tribunál Distritál Suai prezide julgamentu leitura sentensa ba krime omisídiu simples no ofensa ba integridade fizika simples, ne'ebé envolve arguidu Sezario Feliciano Pedro no Aderito dos Santos hasoru lezadu Nicodemos Gonçalves (matebian), iha Munisípiu Bobonaro.

Akuzasaun prokuradór

Prokuradór akuza katak iha 25 Setembru 2021, iha oras tuku 3:00 lokraik, festa nain hapara tiha festa dahur no dansa, tanba ema tuda malu iha festa sorin, tuir mai testemuña Francisco da Silva Canufu ho Sr. Casimiro Lopes fila ba ninia uma, maibé ema tuda malu iha testémuña ninia uma oin nune'e testemuña ho Sr. Casimiro hakilar ema sira ne'ebé tuda malu atu para, maibé ema nafatin tuda malu, nune'e testemuña ho obriga lori tama Casimiro Lopes ba uma laran no testemuña sai fali mai haree lezadu Nicodemos iha estrada boot no diskuti malu hela ho Sr. Salestiano, arguidu Sezario iha nakukun laran halai ba tuku dala rua iha lezadu nia kanuruk, testemuña ba hafahe sira no fila ba hakilar fali ema sira tuda malu. Alende ne'e arguidu Aderito dos Santos Alves kaer kanuru suru rai nian hodi baku dala ida lezadu nia ulun, bainhira testemuña hateke fali ba lezadu maibé lezadu monu ona iha estrada leten, nune'e testémuña hakilar no hatete dehan lezadu Nicodemos ema baku no monu ona iha estrada, hafoin ne'e Sr. Casimiro Lopes husi uma laran sai mai no testemuña Francisco lori lezadu ba uma laran no kontinua kontaktu Ambulacia depois lori lezadu ba Óspital Referál Maliana, hafoin to'o iha Óspital lezadu mós iis kotu.

Husi lezadu nia mate hamosu prejuiju boot ba lezadu nia feen ho oan ba moris loro-loron nian, nune'e husu ba arguidu sira atu indemnizasaun ba lezadu nia feen ho oan ho valor US\$2,000.00.

Prokuradór akuza arguidu sira kontra artigu 138 KP kona-ba omisídiu simples ho moldura penál tinan 8 to'o tinan 20 no artigu 145 KP kona-ba ofensa ba integridade fizika simples ho moldura penal tinan 3 ka multa.

Produsaun ba prova sira

Iha prosesu julgamentu, arguidu Sezario deklara katak momentu fila husi festa to'o iha fatin akontesimentu, lezadu Nicodemos ho nia kolega sira duni arguidu ho nia kolega Salestiano, arguidu deklara katak momentu ne'e lezadu Nicodemos haksesuk malu ho

Salestiano nune'e argudu halai ba tuku duni ema dala rua, maibé arguidu lahatene tuku see tanba kalan no nakukun laharee didiak. Arguidu deklarara tan katak depoisde tuku ema arguidu ho nia kolega Salestiano halai no ba liu uma, arguidu arrepende ninia hahalok, foin primeravés mai hatan iha tribunál.

Enkuantu arguidu Aderito dos Santos konfesa faktu hotu iha akuzasaun no deklarara katak momentu fila husi festa no to'o iha fatin akontesimentu lezadu husi uma sorin halai mai kaer kanuru boot suru rai nian duni arguidu no baku duni arguidu maibé arguidu ses aan no hadau tiha kanuru boot husi lezadu nia liman no baku dala ida lezadu nia ulun, bainhira lezadu monu arguidu mós tauk no halai ba uma, arguidu deklarara tan katak antes ne'e la iha problema ho lezadu sira, arguidu arrepende ninia hahalok no foin primeiravés mai hatan iha tribunál.

Testemuña Francisco da Silva Canufu nu'udar lezadu nia primu, depoimenta katak momentu fila husi festa, antes ne'e ema tuda malu ona iha testemuña ninia uma oin, hafoin testemuña to'o iha uma hakilar ema sira tuda malu no hatete para tiha tuda malu ne'e, testemuña depoimenta tan katak hafoin kolia tiha nune'e lori tama Sr. Casimiro ba iha uma laran no testemuña sai fali mai haree lezadu Nicodemos haksasuk malu hela ho Sr. Salestiano maibé lakleur arguidu Sezario tuku kedan dala rua lezadu nia kanuruk nune'e testemuña ba hafahe lezadu ho arguidu no fila ba hakilar ema sira tuda malu atu para, hafoin hateke fali lezadu, maibé lezadu latan ona iha estrada leten testemuña hakilar hatete dehan ema baku Nicodemos no latan ona iha estrada leten, tuir mai Sr. Casimero Lopes sai husi uma ba ajuda testemuña ba kous lezadu ne'ebé latan iha estrada no kontinua telefone ambulasia hodi lori lezadu ba óspital, maibé to'o iha óspital lezadu iis kotu.

Alegasaun finál

Prokuradór haktuir katak arguidu Sezario Feliciano Pedro provadu no prosidente komete duni krime ofensa ba integridade fízika simples hasoru lezadu, tanba ne'e husu ba tribunál kondena arguidu pena prizaun fulan neen suspende ba tinan ida. Enkuantu ba arguidu Aderito dos Santos provadu komete krime omisídiu simples, bazeia ba konfisaun arguidu nian, ho razaun hirak ne'e husu ba tribunál atu kondena arguidu ho pena prizaun tinan sanulu resin rua.

Entretantu, defeza haktuir katak arguidu nain rua konfesa faktu hotu, maibé defeza intende katak mutivu problema ne'e, lezadu ho nia kolega sira mak asalta arguidu sira no lezadu matebian mak lori kanuru baku ba arguidu Aderito maibé lakona no arguidu hadau tiha kanuru ne'e baku fali ba lezadu. Defeza haree pena ne'ebé prokuradór husu ne'e todan ba arguidu, nune'e husu ba tribunál atu kondena arguidu Aderito dos Santos ho pena prizaun tinan 10, entretantu ba arguidu Sezario kondena ho pena multa.

Desizaun

Depoisde avalia faktu hotu, tribunál prova katak arguidu Aderito dos Santos provadu komete krime omisídiu simples hasoru lezada, bazeia ba konfisaun arguidu nian, enkuantu arguidu Sezario Feliciano Pedro provadu komete krime ofensa ba integridade física simples hasoru lezadu matebian no konfirma mós husi testemuña.

Bazeia ba faktu provadu sira ne'e tetu mós sirkuntansia atenuante sira hanesan arguidu nain rua konfesa faktu hotu, arrepende sira ninia hahalok. Tanba ne'e tribunál konklui prosesu ne'e no kondena arguidu Aderito dos Santos ho pena prizaun tinan ualu, enkuantu ba arguidu Sezario Feliciano Pedro tribunál kondena ho pena prizaun fulan neen suspende ba tinan ida.

8. Krime maus-tratus ba kónjuje ho natureza violénsia doméstika

Nú. Prosesu : 0012/17.MFMFI
Kompozisaun Tribunál : Koletivu
Juis : Dr. Samuel da Costa Pacheco, Dr. Benjamin Barros no
Dra. Patricia de Araújo F. B. Magno Xavier
Prokuradór : Dr. Gostavo da Silva
Defeza : Dr. Fransisco Caitano Martins
Desizaun : Pena prizaun tinan 2 suspende ba tinan 3

Iha 11 Marsu 2022, Tribunál Distritál Suai prezide julgamentu leitura akordaun ba krime maus- tratus ba kónjuje ho natureza violénsia doméstika ne'ebé envolve arguidu AdJ hasoru lezada SdC nu'udar nia eis feen, iha Munisípiu Manufahe.

Akuzasaun prokuradór

Prokuradór akuza katak iha 14 Agostu 2017, iha oras tuku 17:00 lokraik arguidu tuku dala tolu iha lezada nia tilun parte karuk, tuku dala ida iha lezada niaibun no rasta lezada nia fuuk. Antes agreasaun ne'e, bainhira lezada sae kareta atu partisipa misa krisma nian, hafoin lezada to'o iha Same Vila , arguidu halo agreasaun hirak ne'e hasoru lezada sein motivu ne'ebé klaru.

Iha loron no fulan ne'ebé la apura maibé iha tinan 2010, arguidu basa dala rua iha lezada nia hasan parte karuk. Antes agreasaun, ne'e arguidu deskonfia lezada amante (*selingkuh*) ho mane seluk, nune'e arguidu halo agreasaun ne'e hasoru lezada.

Nafatin loron no fulan ne'ebé la apura, maibé iha tinan 2010, arguidu uza ai-naton baku dala ida lezada nia kotuk laran. Antes agreasaun ne'e lezada ho arguidu diskuti malu kona-ba lezada ho mane seluk, nune'e arguidu halo agreasaun ne'e hasoru lezada.

Tuir mai iha tinan no fulan ne'ebé la apura, maibé iha tinan 2011, arguidu basa dala ida iha lezada nia kanuruk. Antes agreasaun ne'e arguidu fila ba uma haruka lezada atu kolia sai kona-ba amante ho mane se maibé lezada nonook de'it, ho nune'e sira diskute malu lezada nervozu fakar bee manas ba arguidu nia hirus matan, nune'e arguidu komete aktu ne'e hasoru lezada.

Prokuradór akuza arguidu kontra artigu 154 KP kona-ba maus-tratus kónjuje ho moldura penál tinan 2 to'o tinan 6.

Produsaun ba prova sira

Iha julgamentu, arguidu konfesa totalmente ba faktu sira iha akuzasaun no deklarata katak depoides akontesimentu ikus ne'e rejolve ona tuir familia maibe la konsege nune'e sira rua moris separadu. Arguidu deklarata tan katak foin primeiraves mai hatan iha tribunál no arrepende ninia hahalok.

Alende ne'e lezada kontinua konfirma faktu hotu iha akuzasaun no deklarata katak perdua arguidu ninia hahalok no reforsa katak moris separadu ona ho arguidu, maibe arguidu nafatin tau matan ba ninia oan nain tolu ne'ebé hela ho lezada.

Alegasaun finál

Prokuradór, haktuir katak arguidu provadu komete krime maus-tratus ba kónjuje hasoru lezada nu'udar nia eis feen no konfirma mós husi lezada. Prokuradór haree katak krime sira hasoru kónjuje aas tebes iha teritoriu Timor L-este, nune'e husu ba tribunál atu kondena arguidu tuir konviksaun tribunál nian, nune'e prevene arguidu komete tan krime hanesan iha futuro.

Enkuantu, defeza haktuir katak iha julgamentu arguidu konfesa faktu hotu iha akuzasaun, arrepende nia hahalok no foin primeraves mai hatan iha tribunál, nune'e husu ba tribunál atu kondena arguidu bazeia ba artigu 145 KP.

Desizaun

depoisde avalia faktu hotu, tribunál prova katak arguidu komete krime maus tratus kónjuje ne'e hasoru lezada nu'udar ninia eis feen.

Bazeia ba faktu provadu sira hotu no tetu mós sirkunstánsia sira hanesan arguidu konfesa faktu hotu iha akuzasaun, foin primeiraves mai hatan iha tribunál, arrepende ninia hahalok, nune'e tribunál konklui prosesu ne'e no kondena arguidu ho pena prizaun tinan rua suspende ba tinan tolu.

9. Krime koasaun seksuál

Nú. Prosesu	: 0037/20.VCSLL
Kompozisaun Tribunál	: Koletivu
Juis	: Dr. Samuel da Costa Pacheco, Dr. Benjamin Barros no Dra. Patricia de Araújo F. B. Magno Xavier
Prokuradór	: Dr. Rafael Jeronimo Gusmão
Defeza	: Dr. Francisco Caetano Martins
Desizaun	: Pena prizaun tinan 3 suspende ba tinan 4

Iha 15 Marsu 2022, Tribunál Distritál Suai prezide julgamentu leitura akordaun ba krime violasaun seksuál envolve ne'ebé envolve arguidu MdS hasoru lezada AM, iha Munisípiu Covalima.

Akuzasaun prokuradór

Prokuradór akuza katak iha 16 Agostu 2020, iha oras tuku 14:00 lokraik, arguidu tula lezada atu ba iha lezada nia uma, hafoin to'o iha dalan klaran, arguidu halai tama ba ema nia toos no dehan ba lezada nune'e "*ó mate iha ne'e agora,*" dehan tiha nune'e arguidu rasta lezada ba iha duut laran no latan lezada ba rai, hafoin arguidu tuur iha lezada leten rein lezada nia orgaun sensitivu, tanba tauk lezada hakilar, maibé arguidu taka lezada nia ibun no hatete ba lezada katak "*ita rua halo lai,*" no lezada hatan katak "*hau feto mesak ó lahanoin hau ka*", maibé arguidu hatan katak "*ó sei la isin rua,*" tuir mai arguidu kontinua buti lezada nia orgaun sensitivu no hasai nia orgaun seksuál atu hatama ba lezada nia ibun maibé lezada la loke ibun, ho nune'e arguidu kose de'it ninia orgaun seksuál iha lezada nia ibun. Atu hases an husi arguidu lezada bosok buka ninia telefone, nune'e arguidu mós hamrik buka telefone no lezada aproveita hodi halai kedan ba iha xefe suku nia uma no tuir mai ba apresenta denunsia iha polisia.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 to'o tinan 15.

produsaun ba prova sira

Iha julgamentu, arguidu konfesa parsialmente ba faktu sira iha akuzasaun, arguidu deklara katak momentu ne'e tula lezada atu ba ninia uma no iha dalan klaran lori lezada ba iha duut laran, arguidu obriga buti lezada nia orgaun sensitivu no rein lezada nia ibun de'it. Entretantu faktu kona-ba arguidu hasai nia orgaun seksuál hodi kose ba lezada nia ibun ne'e la loos, arguidu deklara liután katak kazu ne'e sira rezolve ona tuir tradisaun Timor nian arguidu fó sala ba lezada ho lezada nia família karau aman rua no osan US\$1,000.00 no dame malu ona ho lezada. Arguidu mós deklara katak foin primeiravés mai hatan iha tribunál, arrepende ona nia hahalok no rekuñe katak ninia hahalok ne'e ladi'ak.

Iha parte seluk lezada kontinua konfirma faktu hotu iha akuzasaun no reforsa mós arguidu ninia deklarasaun katak kazu ne'e sira rezolve ona no arguidu fó ona karau aman rua no osan US\$ 1,000.00 ba lezada ho ninia família, mezmu sira diak malu ona maibé lezada sente moe bainhira haree arguidu.

Alegasaun finál

Prokuradór konsidera, arguidu provadu komete krime hasoru lezada, mezmu arguidu nega faktu balun, maibé lezada konfirma ho akuzasaun prokuradór nian, tanba ne'e husu ba tribunál atu aplika pena prizaun tinan ualu ba arguidu.

Entretantu defeza haktuir katak, arguidu deklara de'it faktu ne'ebé nia komete no depoisde akontesimentu ne'e sira di'ak malu ona no arguidu fó ona sala ba lezada ho ninia família, nune'e husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu hotu, tribunál halo alterasaun kualifikasaun husi artigu 172 KP kona-ba krime violasaun seksuál ho moldura penál tinan 5 to'o 15 fali artigu 171 KP kona-ba krime koasaun seksuál ho moldura penál tinan 2 to'o tinan 8, bazeia ba faktu provadu sira katak arguidu kaer lezada ninia orgaun sensitivu no kose ninia orgaun seksuál ba iha lezada nia ibun.

Bazeia ba faktu provadu hirak ne'e no tetu mós sirkunstánsia atenuante sira hanesan arguidu foin primeiravés mai hatan iha tribunál, arrepende ninia hahalok, di'ak malu ona ho lezada, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat.

10. Kazu sivíl regulasaun ba ezersísiu podér paternál

Nú. Prosesu	:0077/21. CVTDS
Kompozisaun Tribunál	: Singulár
Juis	: Dr. José Maria Araújo
Prokuradór	: Dr. Rafael Jeronimo Gusmão
Defeza	: Dr. Albino de Jesus Pereira
Desizaun	: Omologa dezisténsia keixa

Iha 23 Marsu 2022, Tribunál Distritál Suai prezide julgamentu tentativa konsiliausaun ba kazu regulasaun ezersísiu podér paternál, ne'ebé envolve autór EAL ho idade fulan 9 hasoru rekeridu JdA no rekerida JSA nu'udar autór nia aman no inan, iha Munisípiu Ainaro.

Termu no fundamentu sira

Iha data no fulan ne'ebé la apura, maibé iha 2020, rekeridu ho rekerida iha relasaun nomoru no sira rua konsege moris hanesan feen laen, hafoin ne'e rekerida grávida no partus menor ne'e iha 1 Juñu 2021, depoisde menór ne'e moris família husi rekerida konvida rekeridu atu tau matan ba menór ne'e maibé rekeridu la lakohi. Ho nune'e prokuradór representa menór hatama asaun kontra rekeridu hodi tau-matan ba menór nia nesesidade.

Kazu ne'e relaciona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliausaun

Iha julgamentu tentativa konsiliausaun ne'e, rekerida deklara ba tribunál katak menór agora dadaun hela ho rekerida no rekeridu nunca fó alimentasaun, nune'e rekerida husu atu rekeridu tenke fó alimentasaun ba menór kada fulan US\$30.00, maibé rekeridu husu atu hatun ba iha US\$15.00, tanba agora dadaun rekeridu la serbisu. Mezmu nune'e rekerida nafatin husu atu rekeridu kada fulan fó US\$30.00. Tanba ne'e

rekeridu deklara katak nia pruntu atu fó alimentasaun ba menór kada fulan US\$30.00 hahú fulan oin liuhusi rekerida ninia konta bankaria.

Iha ikus parte rua konkorda atu menór kontinua hela ho rekerida, rekeridu livre vizita menór. Enkuantu iha loron Natal no tinan foun, depende rekeridu no rekerida ninia konkordansia.

Alegasaun finál

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

11. Krime ofensa ba integridade fizika simples ho natureza violénsia doméstika

Nú. Prosesu : 0007/21.ANMBS

Kompozisaun Tribunál : Singulár

Juis : Dr. Samuel da Costa Paicheco

Prokuradór : Dr. Rafael Jeronimo Gusmão

Defeza : Dr. Domingos dos Santos

Desizaun : Pena prizaun fulan 2 suspende tinan 1

Iha 25 Marsu 2022, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika, ne'ebé envolve arguidu IST hasoru nia feen, iha Munisípiu Ainaro.

Akuzasaun Prokuradór

Prokuradór akuza katak iha 22 Maiu 2021, iha oras tuku 20:00 kalan, arguidu basa dala ida iha lezada nia matan laran rezulta moras. Antes agreasaun ne'e. arguidu ba hemu tua ho nia kolega sira no tama uma kalan, tanba ne'e lezada hase'e no hatete katak, kalan ne'e tama uma sedu laos kalan boot mak foin tama, nune'e arguidu ho lezada diskute malu no mosu agresaun hirak ne'e no lezada konsege ba halo tratamento iha Óspital Referál Maubisse.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, (a) 3 (a), 35 (b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak depoisde akontesimentu ne'e diak malu fali ona no to'o agora labaku ona lezada, arguidu deklarata tan katak foin primeiravés mai hatan iha tribunál.

Alende ne'e lezada kontinua konfirma faktu iha akuzasaun no reforsa arguidu nia deklarasaun katak arguidu foin mak baku dala ida no depoisde akontesimentu arguidu labaku ona lezada.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, mezmú nune'e atu prevene krime hanesan akontese tan iha futuru, husu ba tribunál atu kondena arguidu tuir konviksaun tribunál nian.

Entretantu, defeza husu ba tribunál atu aplika pena admoestasaun ba arguidu ho konsiderasaun sira katak, arguidu konfesa, arrepende nia hahalok, di'ak malu fali ona ho lezada no depoisde akontesimentu ne'e arguidu la baku ona lezada.

Desizaun

Depoisde avalia faktu hotu, tribunál prova katak arguidu basa dala ida lezada nia matan laran rejulta moras.

Bazeia ba faktu provadu sira ne'e no tetu mós sirkunstánsia atenuante sira hanesan, arguidu konfesa, arrepende nia hahalok no foin primeiravés mai hatan iha tribunál no agora diak malu fali ona, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

12. Krime ofensa ba integridade fizika simples ho natureza violénsia doméstika no aktu seksuál ho adolexente

Nú. Prosesu	: 00051/17.CVSUI
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Rafael Jeronimo Gusmão
Defeza	: Dr. Manuel Amaral
Desizaun	: Pena prizaun tinan 1 fulan 6 suspende ba tinan 2 no absolve

Iha 25 Marsu 2022, Tribunál Distritál Suai prezide julgamentu leitura sentensa ba krime aktu seksuál ho adolexente no ofensa ba integridade fizika simples ho naturéza violénsia doméstika ne'ebé envolve arguidu FA hasoru nia eis feen, iha Munisípiu Covalima.

Akuzasaun prokuradór

Iha 18 Juñu 2018, iha oras tuku 19:00 kalan, arguidu basa dala rua iha lezada nia hasan parte karuk. Antes agresaun ne'e, arguidu ho lezada diskute malu kona-ba lezada la fó han fahi, ho nune'e mosu agresaun hirak ne'e.

Bainhira iha faze inkeritu, prokuradór foin deskobre katak arguidu ho lezada hola malu iha fulan Jullu 2014, no momentu ne'e lezada foin iha idade 14.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa no konjuga artigu 2 (a) 3 (b) 35 (b) no 36 LKVD no artigu 178 KP kona-ba aktu seksuál ho adolexente ho moldura penál tinan 5.

Produsaun ba prova sira

Iha prosesu julgamentu arguidu hili direitu nonook, enkuantu lezada edital.

Testemuña MdA nu'udar lezada nia primu, depoimenta katak momentu akontesimentu ne'e lezada halai ba testemuña ninia uma, testemuña depoimenta tan katak kalan ne'e lezada to'o iha testemuña nia uma no hatete sai kona-ba arguidu basa lezada maibé basa dala hira mós testemuña la husu tuir. Testemuña haktuir katak depoisde problema liu semana ida lezada halai ba iha ninia inan aman iha mota sorin Betun.

Alegasaun finál

Prokuradór haktuir katak, lori arguidu mai iha julgamentu tanba arguidu komete krime ofensa ba integridade fizika simples hasoru lezada ho natureza violénsia doméstika, mezmu iha julgamentu arguidu hili direitu nonook no lezada edital, maibé testemuña konfirma faktu kona-ba ofensa integridade fizika simples ho naturéza violénsia domestika, prokuradór haree katak kona-ba krime aktu seksuál ho adolexente ne'e iha autus la iha lezada ninia sertidaun, maibé nafatin husu ba tribunál atu kondena arguidu pena prizaun tinan ida suspende ba tinan ida enkuantu ba krime ofensa ba integridade fízika simples husu ba tribunál atu kondena arguidu tuir konviksaun tribunál nian.

Entretantu defeza haktuir katak, iha julgamentu arguidu hili direitu nonook no lezada edital, defeza entende katak kona-ba kazu aktu seksuál adolexente prokuradór rasik produs akuzasaun ne'e maibé sira rasik lau tau dokumentus esensial liga ba kazu aktu seksuál adolexente, hanesan lezada nia sertidaun la tau iha autus, tanba ne'e defeza husu tribunál atu absolve arguidu husi krime aktu seksuál adolexente, ba krime ofensa ba integridade fízika simples husu tribunál atu aplika pena multa.

Desizaun

Depoisde avalia faktu hotu, tribunál prova katak arguidu basa dala rua iha lezada nia hasan parte karuk, entretantu kona-ba krime aktu seksuál ho adolexente tribunál

konsidera la provadu, tanba iha julgamentu la iha sasin ruma hatete katak lezada foin atinji tinan 14, nune'e mós iha autus laran mós laiha dokumentu ruma ne'ebé hatete katak lezada foin mak tinan 14.

Bazeia ba faktu provadu no la provadu sira ne'e, no tetu mós sirkunstánsia atenuante sira hanesan arguidu foin primeiravés mai hatan iha tribunál, ho nune'e tribunál konklui prosesu ne'e no kondena arguidu ho pena prizaun tinan ida fulan neen suspende ba tinan rua, enkuantu ba krime aktu seksuál ho adolexente tribunál absolve.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>